

**Ko te Pukapuka a Paora Āpōtoro
ki te
HUNGA O KOROHE
Kupu Whakataki**

Te Pukapuka a Paora Āpōtoro ki te hunga o Korohe i tuhia ki te Hāhi o Korohe, he taone i Āhia Maina ki te rāwhiti o Epeha. Ko tēnei hāhi ehara nā Paora i whakatō, engari, i tū ki roto i te takiwā i raro i āna kawenga, ā, e whakatoro ana i āna kaimahi mai i Epeha, te taone mātua o te takiwā o Roma ki Āhia. I rongo a Paora ki te horihori o ētahi kaiako i roto i te Hāhi o Korohe e whakahau ana ki te mōhio te tangata ki te Atua me te whiwhi oranga tonutanga, me koropiko ia ki ētahi momo ariki wairua me tā rātou kī, me ngohe kau ki ētahi kawa pēnei i te kokotinga me te whakapono tūturu ki ngā kawa e pā ana ki te kai me ētahi atu mea.

Ka tuhia e Paora ōna whakapae o ēnei momo akoranga o te rongopai karaitiana. Ko te iho o tāna whakautu, mā Īhu Karaiti e āhei ai te hōmai i te oranga tonutanga, ā, ko ērā atu akoranga e whāia rā, e huri tuarā kē ana ki a ia. Mā roto i a te Karaiti i hangaia e Te Atua te ao, ā, mā roto i a te Karaiti ka whakahokia mai te ao ki a ia anō. Mā runga i te whakakotahitanga me te Karaiti anake he awhero oranga tonutanga mō te ao. Kātahi ka whakamāramatia e Paora ngā whakataunga o tēnei akoranga whakahirahira mo te hunga whakapono. Te mea i kitea ko Tikuku, nāna nei i mau te reta a Paora ki Korohe, i haere tahi me

Onehimu, he taurekareka, i tuhia nei e Paora he pānui mōna ki Pirimona.

Rāpopoto o Ngā Take

Tīmatanga 1.1-8

Te āhua ki ngā mahi a te Karaiti 1.9–2.19

Te oranga hou i roto i a te Karaiti 2.20–4.6

Whakamutunga 4.7-8

He Mihi

¹ Nā Paora, i paingia nei e te Atua hei āpōtoro mā Karaiti Īhu, nā tō tātou teina hoki, nā Tīmoti –

² Ki te hunga tapu, ki ngā tēina whakapono hoki i roto i a te Karaiti, i Kōrohe:

Kia tau ki a koutou te aroha noa, me te rangi-mārie, he mea nā te Atua, nā tō tātou Matua.

He Īnoi Whakawhetai

³ Tēnei mātou te whakawhetai atu nei ki te Atua, arā ki te Matua o tō tātou Ariki, o Īhu Karaiti, me te Īnoi tonu anō mātou mō koutou,

⁴ nō mātou ka rongo nei ki tō koutou whakapono ki a Karaiti Īhu, ki tō koutou aroha hoki ki te hunga tapu katoa;

⁵ mō te mea e tāria atu nei, e takoto mai nei mā koutou i te rangi. Ko tā koutou i rongo ai i mua ki te kupu o te pono o te rongopai,

⁶ kua tae atu nā ki a koutou; kua whai hua hoki, ā, kua nui haere ki te ao katoa, pēnā hoki i roto i a koutou, nō te rā anō i rongo ai, i mātau ai koutou ki te aroha noa o te Atua i roto i te pono.

⁷ I whakaakona atu nā hoki koutou ki tēnā e Epapara, e tō mātou hoa pononga e arohaina nei; he minita pono nei ia nā te Karaiti ki a koutou.

⁸ Nāna hoki i whakakite mai ki a mātou tō koutou aroha i runga i te Wairua.

⁹ Nō konei hoki, mai o te rā i rongo ai mātou, kāhore e mutu tā mātou karakia me tā mātou inoi mō koutou, kia whakakia koutou ki te mōhio ki tāna e pai ai, i runga i ngā whakaaro nui katoa, i te mahara wairua anō hoki.

¹⁰ Kia tika ai tā koutou haere, kia rite ai ki tā te Ariki, āhuareka rawa, hua rawa i runga i ngā mahi pai katoa, tupu tonu i runga i te mōhio ki te Atua.

¹¹ Kia whakanuia te kaha hei whakakaha mō koutou, kia rite ki tā te mana o tōna korōria, e ū tonu ai, e whakamanawanui ai i runga i te hari.

¹² Me te whakawhetai atu anō ki te Matua, nāna nei tātou i whai tikanga ai ki tētahi wāhi o te kāinga o te hunga tapu i roto i te mārāma.

¹³ Nāna nei tātou i whakaora mai i te kaha o te pōuri, ā, whakawhitia ake tātou e ia ki te rangatiratanga o tāna Tama aroha.

¹⁴ Kei roto nei i a ia tō tātou whakaoranga i runga i ōna toto, arā te murunga o ngā hara.

Ko Karaiti me Tāna Mahi

¹⁵ Ko ia nei te āhua o te Atua e kore nei e kitea atu, ko te whānau mātāmua o ngā mea hanga katoa.

¹⁶ Nāna hoki ngā mea katoa i hanga, ngā mea i te rangi me ngā mea i te whenua, ngā mea e kitea ana me ngā mea kāhore e kitea, ahakoa torōna, ahakoa kāwanatanga, ahakoa rangatiratanga, ahakoa mana. Nāna, ā, mōna te hanganga o ngā mea katoa.

¹⁷ Nō mua anō hoki ia i ngā mea katoa, nāna anō hoki ngā mea katoa i mau ai.

¹⁸ Ko ia anō te ūpoko o te tinana, arā o te hāhi. Ko ia te tīmatanga, ko te whānau mātāmua i roto i te hunga mate; kia waiho ai ia hei tuatahi i roto i ngā mea katoa.

¹⁹ Ko tā te Matua tērā i pai ai, kia noho te huanga o ngā mea katoa ki roto ki a ia;

²⁰ kia mā roto ai i a ia he houhanga rongo mō ngā mea katoa ki a ia, kua mau nei i a ia te rongo i ngā toto o tōna rīpeka; āe rā, mā roto i a ia, ahakoa he mea nō te whenua, ahakoa he mea nō te rangi.

²¹ Me koutou hoki he tāngata kē i mua, he hoariri te hinengaro i ngā mahi kino, nā, kua meinga nei e ia kia houhia tā koutou rongo,

²² i runga i te tinana o tōna kikokiko, he mea nā te mate; mō koutou anō kia tāpaea atu ki tōna aroaro, he hunga tapu, kāhore nei he koha, kāhore he hē;

²³ ki te pūmau koutou ki te whakapono, ū tonu, mau tonu, tē taea te whakaneke atu i te tūmanako ki tā te rongopai i rongo ai koutou, kua kauwhautia atu nei ki ngā mea hanga katoa i raro o te rangi. Mō reira nei ahau, a Paora, i meinga ai hei minita.

Te Mahi a Paora he Pononga ki te Hāhi

²⁴ Tēnei ahau te hari nei ki ōku mamae mō koutou, ka kapi hoki i ōku kikokiko ngā mate o te Karaiti kāhore anō i rite noa, hei mea mō tōna tinana, arā mō te hāhi.

²⁵ Mō reira nei ahau i meinga ai hei minita, rite tonu ki tā te Atua tikanga ki a koutou i hōmai nei ki ahau, kia whakapaua te kauwhau o te kupu a te Atua,

²⁶ o te mea ngaro i huna i ērā wā noa atu, i ērā whakatupuranga; ā, kua whakakitea ināianei ki tāna hunga tapu,

²⁷ he meatanga nā te Atua, kia whakaaturia ki a rātou te taonga nui o te korōria o tēnei mea ngaro ki roto ki ngā tauwi, arā, a te Karaiti i roto i a koutou, e tūmanako atu ai ki te korōria.

²⁸ E kauwhautia nei e mātou, me te whakātūpato i ngā tāngata katoa me te whakaako i ngā tāngata katoa i runga i ngā whakaaro mōhio katoa, kia tāpaea atu ai e mātou ngā tāngata katoa, he mea tino tika i roto i a te Karaiti.

²⁹ Ko tāku tēnei e uua nei, e tohe nei i runga i tāna mahinga e kaha nei te mahi i roto i ahau.

2

¹ E mea ana hoki ahau kia mōhio koutou ki te nui o tōku uua mō koutou, mō te hunga anō hoki o Raorikia, ā, mō te hunga katoa hoki kāhore nei i kite noa i tōku mata i te kikokiko.

² Kia whakamārietia ō rātou ngākau, kia tūhono-honoa i runga i te aroha, kia taea ai ngā taonga katoa o te tino whakaūnga o te ngākau mahara, kia mātau ai rātou ki te mea ngaro a te Atua, arā ki a te Karaiti;

³ kei roto nei i a ia ngā taonga katoa o te mahara, o te mātauranga e huna ana.

⁴ Nā, i kōrero ai ahau i tēnei, kei kūmea kētia koutou e te kōrero reka a te tangata.

⁵ Nō te mea ahakoa kei tawhiti tōku kikokiko, kei a koutou nā tōku wairua, e hari ana, e titiro ana ki ā koutou ritenga tika, ki te ū anō hoki o tō koutou whakapono ki a te Karaiti.

Te Tino Hua o te Ora i roto i a te Karaiti

⁶ Nā, kua riro nā te Ariki, a Karaiti Īhu i a koutou, kia pēnā anō tā koutou haere i roto i a ia;

⁷ kia whai pakiaka, ānō he whare i hangā ki runga ki a ia, whakapūmau rawa ki runga ki tō koutou whakapono, kia pērā me koutou i whakaakona rā, kia hira rawa ai te whakawhetai.

⁸ Kia tūpato kei riro pārau koutou i tō te tangata whakaaro mōhio, i te tīnihanga huakore, e rite nei ki te whakarereanga iho a te tangata, ki ngā mea tīmatanga o te ao, ā, kāhore ki a te Karaiti.

⁹ Kei roto katoa hoki i a ia te tino o te Atua e noho-ā-tinana ana.

¹⁰ Ā, kua tino tangata anō koutou i roto i a ia, ko te ūpoko nei ia o ngā rangatiratanga, o ngā mana katoa.

¹¹ He mea kokoti koutou i roto i a ia, he kotinga kīhai i meatia e te ringaringa, i te unuhanga atu i te tinana o ngā hara o te kikokiko, i tō te Karaiti kotinga;

¹² he mea tanu tahi koutou me ia i te iriiringa, he mea whakaara ngātahi anō hoki me ia i reira, nō te mea ka whakapono nei ki te mahi a te Atua, nāna nei ia i whakaara ake i te hunga mate.

¹³ He tūpāpaku nā hoki koutou i ngā hē, i te kotingakore hoki o tō koutou kikokiko, nā, whakaorangia ngātahitia ana koutou me ia, he mea whakarere noa atu nāna ō koutou hē katoa.

¹⁴ Murua ake e ia ngā tikanga i tuhituhia e te ringaringa, ngā tikanga i hoariri ki a tātou, i tū kē mai i ā tātou; tangohia ake e ia ki rahaki, he mea titi nāna ki te rīpeka;

15 pāuhua ake e ia ki raro ngā rangatiratanga me ngā mana, whakakitea nuitia ana e ia, ā, waiho ana e ia taua rīpeka hei mea whakataka māna i ā rātou.

16 Nā, kuaa tētahi e whakawā i ā koutou mō te kai, mō te inu, mō ngā meatanga ki te hākari, ki te kōwhititanga marama, ki ngā hāpati;

17 he ātārangi ēnei nō ngā mea i kīa e puta ana i muri; nō te Karaiti ia te tinana.

18 Kei riro tā koutou taonga i te māminga a te tangata e mea ana ki te whakaiti i a ia, ki te karakia ki ngā anahera, ka noho i roto i ngā mea e kitea ana e ia, ka whakapehapeha kau noa, he mea nā tōna ngākau kikokiko;

19 ā, kāhore e mau ki te Ūpoko, nō roto nei i a ia te tinana katoa, he mea atawhai, he mea tūhono-hono e ngā hononga, e ngā here, ka tupu ai, he tupu nā te Atua.

Ka Mate, ka Ora i roto i te Karaiti

20 Ki te mea kua tūpāpaku ngātahi koutou ko te Karaiti ki ngā mea tīmatanga o te ao, he aha koutou, ānō e ora ana ki te ao, ka pupuri tonu ai i ngā tikanga,

21 “Kei pā ringaringa, kei pā kai, kei rahurahu”

22 He mea pirau katoa nei aua mea i te meatanga iho anō, he whakahau, he ako nā te tangata?

23 Ko te āhua o aua mea i whakaritea ki tō te whakaaro nui, he karakia pokanoa, he whakaiti i a ia ake, he atawhaikore i te tinana; otirā kāhore he painga hei pēhi i te kikokiko e tōrere ana kia mākona ia.

3

¹ Nā, ki te mea kua ara ngātahi koutou me te Karaiti, rapua ngā mea o runga, o te wāhi e noho mai nei ā te Karaiti i te ringa matau o te Atua.

² Kia anga atu tō koutou whakaaro ki ngā mea o runga, kua ki ngā mea kei te whenua.

³ Kua mate hoki koutou, ā, kua oti tō koutou ora te huna ki a te Karaiti i roto i te Atua.

⁴ I te whakakitenga mai o te Karaiti, o tō tātou ora, ko reira hoki koutou whakakitea tahitia ai me ia i runga i te korōria.

Te Oranga ō Mua me te Oranga Hou

⁵ Nā, whakamatea ō koutou wāhi i runga i te whenua; te moe tāhae, te poke, te minamina ki te hē, te hiahia kino, me te apo, he karakia whakapakoko hoki tēnā.

⁶ He mea hoki ēnei e puta mai ai te riri o te Atua ki ngā tamariki a te tutū.

⁷ I roto hoki koutou i ēnei mea e haere ana i mua, i ā koutou e noho ana i roto i aua mea.

⁸ Tēnā ko tēnei whakarērea ēnei mea katoa; te āritarita, te riri, te mauāhara, te kōrero kino, te kōrero whakarihariha, i roto i ō koutou māngai.

⁹ Kua e teka tētahi ki tētahi, kua unuhia atu hoki i a koutou te tangata tawhito me āna hanga.

¹⁰ Kua kākahuria nei te tangata hou, e whakahoutia nei i runga i te mātauranga kia rite ki te āhua o tōna kaihanganga.

¹¹ Kei reira kāhore he Kariki, he Hūrai rānei, he kotinga, he kotingakore rānei, he tautangata, Haitiana, pononga, he rangatira rānei; engari ko te Karaiti te katoa, i roto anō i te katoa.

¹² Nā, kia rite ki te hunga whiriwhiri a te Atua, ki te hunga tapu e arohaina ana, kākahuria iho hoki te ngākau tohu tangata, te ngāwari, te ngākau pāpaku, te ngākau māhaki, te manawanui.

¹³ Kia āta hanga koutou tētahi ki tētahi, me te hohou i te rongo tētahi ki tētahi, ki te mea kei tētahi he take riri ki tētahi; kia rite ki tā te Ariki i hohou nei i te rongo ki a koutou, kia pērā anō hoki koutou.

¹⁴ Ā, hei waho i ēnei mea katoa uhia ko te aroha, ko te tauhere tika rawa ia.

¹⁵ Ā, waiho mā te rangimārie a te Karaiti te whakahaere tikanga i roto i ō koutou ngākau. I karangatia hoki koutou ki tēnei i roto i te tinana kotahi; kia whakawhetai hoki koutou.

¹⁶ Kia noho nui te kupu a te Karaiti i roto i a koutou i runga i te mātauranga katoa; me whakako, me whakatūpato tētahi e tētahi ki ngā waiata tapu, ki ngā hīmene, ki ngā waiata wairua, me te waiata anō ki te Atua i runga i te aroha noa, i roto i ō koutou ngākau.

¹⁷ Ko ngā mea katoa hoki e mea ai koutou, ko ngā kupu, ko ngā mahi rānei, kia meinga katoatia i runga i te ingoa o te Ariki, o Īhu, me te whakawhetai anō ki te Atua, arā ki te Matua i roto i a ia.

Te Pānga Whaiaro i roto i te Oranga Hou

¹⁸ E ngā wāhine, kia ngohengohe ki ā koutou tāne ake, kia rite ai tā te Ariki tikanga.

¹⁹ E ngā tāne, arohaina ā koutou wāhine, kei kaha hoki te riri ki a rātou.

²⁰ E ngā tamariki, whakarongo ki ō koutou mātua i ngā mea katoa; he mea pai hoki tēnei ki te Ariki.

²¹ E ngā mātua, kei ārita noa ki ā koutou tamariki, kei ngākaukore rātou.

²² E ngā pononga, kia whakarongo ki ō koutou rangatira o te wāhi ki te kikokiko i ngā mea katoa. Kua hei tā te kanohi mahi, he whakamānawareka tāngata hoki tērā; engari hei runga i te ngākau tapatahi, me te wehi anō ki te Atua.

²³ Ko ngā mea katoa e mea ai koutou mahia-ā-ngākautia, hei mea ki te Ariki, ā, ehara i te mea ki ngā tāngata;

²⁴ me te mātau anō, ka hōmai e te Ariki ki a koutou te utu, arā te kāinga; he pononga hoki koutou nā te Ariki, nā te Karaiti.

²⁵ Ko te tangata hoki e hē ana te mahi, ka whakawhiwhia anō ia ki tāna hē i mahi ai; kāhore hoki he whakapai kanohi.

4

¹ E ngā rangatira, hoatu ki ngā pononga te mea e tika ana, te mea e rite ana; e mōhio ana hoki koutou he Rangatira tō koutou kei te rangi.

He Tohutohu

² Kia ū ki te inoi, kia mataara tonu ki taua mea i runga i te whakawhetai;

³ me te inoi anō mō mātou, kia whakapuaretia e te Atua he kūwaha kōrero ki a mātou, hei kōrero-tanga i te mea ngaro a te Karaiti i hereherea ai ahau.

⁴ Kia whakakitea atu ai e ahau, kia rite ai tāku kōrero ki te mea i tika.

⁵ Hei runga i te whakaaro mōhio tō koutou whakahaere ki te hunga o waho, hokona te tāima.

⁶ Hei runga i te aroha noa tā koutou kōrero i ngā wā katoa, he mea kīnaki ki te tote, kia mātau ai koutou ki te tikanga mō te whakahoki kupu atu ki tēnei tangata, ki tēnei tangata.

Poroporoaki

⁷ Mā Tikiku e whakaatu āku mea katoa ki a koutou; he teina aroha ia, he minita pono, he hoa pononga i roto i te Ariki.

⁸ Ko te tino pūtake tēnei i tonoa atu ai ia e ahau ki a koutou, kia mātau ai koutou ki tō mātou āhua, ā, kia whakamārietia ai ō koutou ngākau;

⁹ rāua ko Onehimu, he teina pono, e arohaina ana, ā, nō koutou hoki ia. Mā rāua e whakaatu ki a koutou ngā mahi katoa o konei.

¹⁰ He oha tēnei ki a koutou nā Aritaku, nā tōku hoa herehere, rāua ko Māka irāmutu o Pānapa; kua tae atu nā hoki ngā tikanga mōna ki a koutou; ki te tae atu ia ki a koutou, manaakitia;

¹¹ me Īhu anō hoki, tētahi ingoa ōna ko Hutuha; nō te kotinga rātou. Ko ēnei anake ōku hoa mahi ki te rangatiratanga o te Atua, he orange ngākau anō rātou ki ahau.

¹² Tēnei te oha atu nei ki a koutou a Eapara; nō koutou ia, he pononga nā te Karaiti. He tohe tonu tāna ki te inoi mō koutou, kia tū koutou, he hunga tino tika, pūmau tonu ki ngā mea katoa i pai ai te Atua.

¹³ Ko ahau hoki tōna pono mō tāna mahi nui mō koutou, mō te hunga hoki i Raorikia, ā, mō te hunga i Hierapori.

¹⁴ Tēnei te oha atu nei ki a koutou a Ruka, te rata aroha, rāua ko Rīmaha.

¹⁵ Oha atu ki ngā tēina i Raorikia, ki a Naimapa hoki, ki te hāhi anō hoki i tō rātou whare.

¹⁶ Ā, ka kōrerotia tēnei pukapuka ki a koutou, meinga kia kōrerotia anō hoki i roto i te hāhi o ngā Raorikia; kōrerotia anō hoki e koutou tērā i tuhia mai i Raorikia.

¹⁷ Mea atu hoki ki a Arakipu, “Kia mahara ki te mahi minita kua riro nā i a koe i roto i te Ariki, kia āta mahia mārietia.”

¹⁸ Ko te oha āku, a Paora, nā tōku ringaringa ake. Kia mahara ki ōku mekameka.

Kia tau te aroha noa ki a koutou.

Te Kawenata Hou

Maori: Maori NT - converted from RTF LAI

copyright © 1952,2008 Bible Society New Zealand Charitable Trust

Language: Māori

Contributor: Bible Society New Zealand

Te Kawenata Hou

Maori New Testament

Bible Society New Zealand

This translation is made available to you under the terms of the Creative Commons Attribution-No Derivatives license 4.0.

You may share, redistribute, or adapt this Bible translation or extracts from it in any format, provided that:

You include the above copyright and source information.

You do not use this work for commercial purposes.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2025-10-16

PDF generated using Haiola and XeLaTeX on 31 Oct 2025 from source files dated 31 Oct 2025

f5251fa7-4780-5900-96bf-6211b45050b2